

Cabaran ekonomi, isu banjir tumpuan Dewan Rakyat hari ini

Oleh NUR HUDA MUSA

3 Oktober 2022, 9:51 am

PETALING JAYA – Langkah kerajaan menangani cabaran ekonomi dan kesiapsiagaan agensi kerajaan dalam menghadapi kemungkinan bencana banjir adalah antara tumpuan utama pada hari pertama Mesyuarat Ketiga Penggal Kelima Parlimen ke-14 hari ini.

Menurut aturan urusan mesyuarat di laman web rasmi Parlimen, persoalan mengenai cabaran ekonomi itu diajukan Tajuddin Abdul Rahman (BN-Pasir Salak) kepada Perdana Menteri yang ingin tahu tindakan kerajaan menangani cabaran tersebut demi menjaga kebajikan serta kesejahteraan Keluarga Malaysia semasa sesi Pertanyaan bagi Jawab Lisan di Dewan Rakyat.

Sementara itu, Datuk Seri Anwar Ibrahim (PH-Port Dickson) pula meminta Perdana Menteri menyatakan perangkaan terkini butiran kategori pendapatan berkenaan isi rumah mengikut kategori B40, M40 dan T20 menurut pecahan tahun bermula 2019 sehingga 2022.

Ahli Parlimen Kota Samarahan, Datuk Rubiah Wang pula meminta Perdana Menteri untuk menyatakan status Jawatankuasa Pengurusan Bencana Daerah di seluruh negara bagi menghadapi kemungkinan bencana banjir pada hujung tahun ini.

Selain itu, Fong Kui Lun (PH-Bukit Bintang) turut meminta Menteri Wilayah Persekutuan menyatakan persiapan kementerian itu bagi menghadapi bencana banjir yang dijangka melanda Kuala Lumpur pada akhir tahun ini.

Turut menjadi tumpuan juga ialah pertanyaan Ahli Parlimen Seremban, Loke Siew Fook yang meminta Menteri Kanan Kerja Raya menyatakan jangkakan tarikh siap projek Lebuhraya Bertingkat Sungai Besi – Ulu Kelang (SUKEL), Lebuhraya Bertingkat Damansara – Shah Alam (DASH), Lebuhraya Bertingkat Setiawangsa – Pantai (SPE) dan Lebuhraya Lembah Klang Timur (EKVE) serta senaraikan kadar tol yang akan dikenakan kepada semua jenis kelas kenderaan.

"Sebanyak RM8 juta diperuntukkan untuk Pengurusan Pengoperasian Bencana kepada JPBN meliputi kegunaan 160 daerah. Kerajaan juga memberikan RM4.8 juta bagi penyediaan 320 buah bot fiber bersama enjin untuk daerah-daerah terlibat," katanya.

Sementara itu, Ismail Sabri menjelaskan, sebanyak 22,622 aset air seperti bot, treler bot dan jet ski milik semua agensi turut digerakkan untuk menghadapi musim monsun itu.

"Semua aset itu perlu dikoordinasi dengan sebaik mungkin supaya kerja-kerja menyelamatkan dilaksanakan dengan berkesan. JPBN dan JPBD juga perlu memastikan sistem amaran awal turut berfungsi dengan baik.

"Mesyuarat juga bersetuju supaya bunyi amaran awal berbeza dengan bunyi siren yang lain seperti ambulans dan kereta peronda polis bagi mengelakkan kekeliruan," katanya. – KOSMO! ONLINE